

**Tamanut ammasumik tusarniaanerni ammanerunissap qulakkeerneqarnissaanik Naalakkersuisut peqquneqarnissaannik Inatsisartuni aalajangiiffigisassatut siunnersuut. Minnerpaamik tusarniaanernut najoqqutassanik tamanit pissarsisinnaanissaat qulakkeerneqassaaq.**

Inatsisartunut ilaasortaq Múte B. Egede, Inuit Ataqtigiit

## **Akissuteqaat**

(Naalakkersuisut Siulittaasuat)

### **1. Siullermeerneqarnera**

Naalakkersuisut aallaqqaasiullugu Inatsisartunut ilaasortaq Múte Bourup Egede, Inuit Ataqtigiit, aalajangiiffigisassatut siunnersuutaanut qutsavigaat.

Siunnersuuteqartoq aalajangiiffigisassatut siunnersuutip siullermeerlugu suliarineqannginnerani Inatsisartut Suleriaasianni § 37, imm. 1 naapertorlugu aalajangiiffigisassatut siunnersuummut tunngassuteqartoq pillugu Naalakkersuisunut arlaleriarluni apeqquteqartarsimavoq.

§ 37 naapertorlugu apeqqut akineqareermat, oqaatigissavara aalajangiiffigisassatut siunnersuummut Naalakkersuisut oqaaseqaataat § 37 naapertorlugu apeqqummut pineqartumut akissutinut assingupajaarmata.

Naalakkersuisut sinnerlugit erseqqissaatigerusuppara tamanut ammasumik tusarniaasarneq Naalakkersuisut isumaat malillugu malittarisassat atuuttut, tassa inatsit kiisalu ilitsersuutit aamma suliffimmi malittarisassat naapertorlugit nalinginnaasumik pisarmat.

Naalakkersuisut aamma erseqqissaatigissavaat malittarisassat aalajangiiffigisassatut siunnersuummi taaneqartut allaffissornerup iluani malittarisassaammata kiisalu malittarisassat ilitsersuutit isigisassaannerummata. Malittarisassat ilitsersuutinut najoqqutassanullu tusarniaanermi atorneqartartunut tapiliussaapput.

Tassunga atatillugu malugeqquneqarpoq inatsit ilarpassui imaqarmata tusarniaanermut tunngatillugu aalajangersakkanik immikkut ittunik, tassa aalajangersakkanik immikkut ittunik Inatsisartunit aalajangersarneqarsimasunik. Inatsisini tusarniaatitsinissamut immikkut aalajangersagalinni assersuutit taaneqarsinnaasunut ilaapput suliat suliarineqartarnerat pillugit inatsit, aatsitassanut inatsit, aalisarnermut inatsit, unammilleqatigiinnermut inatsit, avatangiisinik illersuinissamut inatsit, akileraaruserinermik ingerlatsinermut inatsit, suliniutinut angisuunut inatsit aamma nunaminertanik atuinissamut pilersaaruserinermullu inatsit.

Aamma - malittarisassat aalajangiiffigisassatut siunnersuummi taaneqartut saniatigut - Naalakkersuisut aqutsinerannut tunngatillugu ilitsersuuteqarpoq il.il. tamanut ammasumik

tusarniaanissap aaqqissuunneqarnissaanut pingaaruteqartunik. Tassani assersuutigalugu pineqarput inatsisiliornermi malittarisassat allaffissornikkut aalajangersaaffigineqarsimasut.

Tamanna tunngavigalugu tusarniaasarneq pillugu aalajangersakkat ilitsersuutillu assigiinngitsut allaffissornikkut suliaqarnissap aaqqissuunneqarneranut ilanngunneqartussat ataatsimut isigineqarsinnaapput. Inatsisitigut najoqqutassiat allallu suliffiup iluani avataanilu tusarniaassutigineqarnissaannut malittarisassat aalajangiiffigisassatut siunnersuummi pineqartut malittarisassanut ilitsersuutinullu ilaaginnarput, taamaattoq malittarisassanut ilitsersuutinullu atuuttunut allanut ataqatigiissutut isigineqassapput.

Ilisimatitsissutigisinnaavara tusarniaanermi malittarisassat pineqartut, inatsisiliornermi malittarisassat ilanngullugit, misissorneqareerpata Naalakkersuisut nittartagaanni Naalakkersuisut Siulittaasuata Naalakkersuisoqarfiata ataanut ilanngunneqassammata.

Naalakkersuisut aamma ilanngullugu erseqqissaatigissavaat tamanut ammalluinnartumik tusarniaasarneq Naalakkersuisuni suleriaaseq malillugu atuutereermat. Assersuutitut taaneqarsinnaavoq inatsisissatut siunnersuutinut missingiutit, aalajangiinerit allallu tamanut tusarniaassutigineqarnerannut Naalakkersuisut tusarniaanermut nittartagaa aqutugalugu kikkulluunniit peqataasinnaammata.

Paasissutissiissutigisinnaavara akissuteqaatip matuma naammassillugu suliarineqarnerani inatsisissatut siunnersuutinut allanullu missingiutit 18-it Naalakkersuisut tusarniaanermut nittartagaatigut tamanut tusarniaassutigineqarmata. Siusinnerusukku tusarniutigineqartunut toqqorsivimmi assersuutigalugu takuneqarsinnaavoq tusarniaanermut nittartakkami inatsisissatut siunnersuutit 57-it 2018-imi tusarniaassutigineqarsimasut. 2017-imi tusarniaanerit katillugit 98-iusimapput.

Suliap qanoq ittuunera apeqqutaalluni tusarniaatitsinerit ingerlanneqartut, tusarniaanermullu akissutinut tiguineqartunut oqaaseqaatit immikkut uppernarsarneqartassapput. Tamanna assersuutigalugu pisarpoq Naalakkersuisut inatsisissatut siunnersuutinut nalinginnaasumik nassuiaateqarnerisigut imaluunniit pisortat tusarniaatitsinerannut nalunaarusiani immikkut ittuni.

Oqaaseqaatit saqqummiunneqartut innersuussutigalugit Naalakkersuisut inassutigaat aalajangiiffigisassatut siunnersuut akuerineqassasoq.